

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 70 (1985)
Heft: 25

Artikel: Umens prominents da Selva e Tschamut
Autor: Widmer, Ambros
DOI: <https://doi.org/10.5169/seals-881729>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

Umens prominents da Selva e Tschamut

da pader Ambros Widmer

En connex culla perscrutaziun della varianta dialectala da Selva/Tschamut ella part superiura della Val Tujetsch vein nus entupau ella historia sis umens che meretan de vegnir presentai. Buca tuts ein oriunds da Selva u Tschamut, mo ein ligiai cun quei territori d'ina maniera u l'autra. La depopulaziun de nossas fracziuns isoladas progredescha gest en nies cass schi spert ch'igl ei cunvegnent de salvar la memoria dellas persunalitads las pli marcantas. La selecziun ei forsa historicamein me-
mia subjectiva e probablamein savess ins aschuntar in u l'auter caplon de Selva (p. ex. Sur Johann Josef Deplaz, caplon a Selva 1818–1859, Sur Stefan Schuler 1948–1968), mo lein surschar quei ad in historicher local.

Pader Cristian Hetz SJ (1718–1780)

Naschius a Selva ils 25 de december 1718 – in affon de Nadal – dals geniturs Jodoc Hetz e Mengia Riedi entra quei giuven egl uorden dils gesuits ils 29 de november 1743 e fa il profess definitiv ils 2 de fevrer 1756. Igl onn 1752 (supponiu) vegn el ordinaus sacerdot. Pader Cristian lavura sco misiunari, catechist e directur de differentas uniuns a Rottenburg, Amberg, Ottingen, Landsperg, Rottweil, Feldkirch ed auters loghens. Igl uorden dils gesuits vegn suspendius igl onn 1773 da Papa Clemens XIV e vegn puspei admess igl onn 1814 da Papa Pius VII. Duront quei temps opere-scha pader Cristian Hetz sco spiritual secular. El ha priu sia dimora a Feldkirch, nua ch'el miera ils 26 d'uost 1780. El ei satraus a Rankweil en pierti baselgia, nua che siu portret penda vid la preit. Aschia scriva pader Baseli Berther en sia brochura davart las baselgias, capluttas e spiritualessers de Tujetsch (p. 41). Mo las retschercas recentas han mussau che quei portret ei vegnius naven el decuors della restauraziun della baselgia. Pader Placi Spescha (1752–1833) menziunescha quei pader Hetz en sia scartira sur la Val Tujetsch. «Beschreibung des Tavetschertales im Bündner Oberland» (Pieth/Hager p. 236) culs suandonts plaid: «Im vorhergehenden Jahrhundert zeichneten sich drei Männer von Tavätsch in den Wissenschaften aus, so der P. Martin Biart, Religios von Disentis. . . ferner der Jesuit Hiz von Selva und ein gewisser N. Venzin, welche in mehreren Fächern der Wissenschaften sehr wohl bewandert waren.»

Fontaunas

Berther P. Baseli, Baselgias, capluttas e spiritualessen de Tujetsch. Studi historic. Ingenbohl 1924

Pieth Friedrich/Hager P. Karl. Pater Placidus a Spescha, Bümpliz-Bern 1913

Pictur-artist Felix Maria Diogg (1762–1834)

Diogg nescha ad Ursera en ina famiglia de sis affons dals geniturs Columban Diogg-Deflorin. Il bab ei oriunds dalla Val Formazzo e la mumma Maria Catrina Deflorin vegn da Tschamut. Felix Maria vegn en contact cun Tschamut suenter che la famiglia ha piars la casa el barschament ded Ursera 1766 e serenda a Tschamut, nua ch'ils geniturs dalla mumma procuran per ina habitaziun. Il bab survegn lavur ella claustra de Mustér sco scrinari, siu buob accumpogna el, ed igl avat Columban Sozzi discuvera il talent extraordinari de maliar de quei buob. Felix astga ir all'academia de picturs a Besançon. Cheu semanifestescha sia habilitad oravontut el portret de personas. El retuorna a Tschamut, malegia probabla mein en quei temps sogn Gieri silla tuor-baselgia a Sedrun. Mo sias aspiraziuns van pli lunsch: El serenda a Ruma per studiar ils gronds artists – la cumparegliaziun deprimescha plitost el – tuorna spert e pren sia dimora a Rapperswil, nua ch'el marida 1792 ina feglia ord la nobla famiglia dils Curtis. Siu mund seslarga, el fa enconuschientscha cun J.C. Hirzel e J.C. Lavater a Turitg, entaupa perfin Goethe a Stäfa, ed empustaziun suonda sin empustaziun. Diogg viagescha a Neuchâtel, Basilea, Strassburg e Frankfurt, portretond dapertut ils umens prominents. Il punct culminont de sia carriera artistica vegn 1814, cura ch'el vegn clamaus a Karlsruhe per malegiar l'imperatura della Russia, la consorta dil Zar Alexander. Diogg ei ussa il pli renomau portretist della Svizra ed el scalfescha varga 600 ovras. Mo el emblida buca Tschamut. Aunc els vegls dis lai el encrescher e plaيدا bugen da sia emprema patria els cuolms grischuns. El mantegn la carezia per il lungatg romontsch, la viarva de sia mumma. Nua ch'ei seporscha ina caschun tschontscha el romontsch e sias oraziuns fa el adina per romontsch, aunc sin pugn de mort.

Fontaunas

Hirzel (Johann Caspar) über Diogg, den Mahler, einen Zögling der Natur. Turitg 1792

Müller Josef. Kunstmaler Felix Maria Diog, en: Zweites Historisches Neujahrs-Blatt, hrsg. von der Gesellschaft für Geschichte und Alterthümer des Kantons Uri, 1896, p. 1–21

Pieth Friedrich/Hager P. Karl. Pater Placidus a Spescha. Bümpliz-Bern 1913, p. 235 e 372

Venzin Gion Benedetg. Felici Diogg, il pictur de Tschamut, en: Calender Romontsch 1922, p. 78—»

Hugelshofer Walter. Felix Maria Diogg. Ein Schweizer Bildnismaler 1762–1834), Turitg 1941

Bucholzer Columban. Felix M. Diogg, en: Bündner Monatsblatt 1944, p. 255–260

Hendry Ludovic. Il portretist da Tschamut. Ovra svizra per lectura alla giuventegna nr. 1208, Cuera 1972

Oberholzer Paul. Der Portraitmaler Felix Maria Diogg (1762–1834), en: Vaterland dils 18 da fevrer 1984

Dosch Luzi. «Herr Felix Diogg, ein Portraitmahler», en: Bündner Jahrbuch 1984, p. 151–153

Müller Iso. Geschichte von Ursern, Disentis/Mustér 1984, p. 213–215, 224, 230

Scolast Josef Steiner (1828–1904)

Josef Steiner ei buc oriunds da Selva, mo P. Baseli Berther numna el 'il poet de Selva' (Selva avon 100 onns, p. 3). Josef Steiner vegn da Compagnials, frequenta la scola en claustra, il seminari de scolasts e vegn 1856 en Tujetsch, nua ch'el dat scola duront 30 onns: a Cavorgia, Surrein, Sedrun, Camischolas e lu surtut a Selva. La stad lavura el sco vier al stradun digl Alpsu ed el enconuscha mintga caraun, gie mintga ruosna della via. Cura ch'el va encunter ils otgonta, serenda el a Sedrun per star leu. El astga star per nuot ella veglia casa de scola, e buns vischins de Sedrun han quitaui ded el. El miera ils 23 de settember 1904 e la dumengia sissu accumpogna in grond pievel il zun carezau scolast al davos ruaus sil santeri de Sedrun.

L'ovra de Josef Steiner ei zun voluminusa. Bein settracta ei buca d'ina ovra litterara el ver senn dil plaid. El scriva tocs de teater per ils scolars, p. ex. 'Representaziun della naschientscha de Christus e dell'adoraziun dils pasturs e dils sabis digl Orient', 'Representaziun d'ina nauscha dispetta denter il Scheiver e la Cureisma', e 'La representaziun dil Fegl per diu'. Ei maunca era buca las cumedias, p.ex. 'La Schumelina', ina cumedia dada a Camischolas anno 1882. – Steiner cumpona biaras canzuns, seigi canzuns de caschun, p.ex. 'Nozzas', 'La carezia tschocca', 'Canzun silla vegnida dil Sgr. Inspector', 'Canzun sigl examen', 'Canzuns dils scolars pigns', seigi canzuns religiosas, p.ex. 'Canzun della sontga afonza fatga a Selva 1870', canzuns en honor de Nossadunna. Zun enconuschenta ei vegnida sia canzun: 'Il Toni de scuas a perdanonza'. –

Per la historia e tradiziun locala ei nies scolast ina fontauna preziusa. Ella 'Poesia della vall Tujetsch' descriva el en 26 strofas tut las fracziuns

e cuolms della val. El descriva era 'Las casas de scola della val Tujetsch', e 'La val Selva a Tujetsch' ei ina liunga e precisa descripziun della historia e situaziun actuala de Selva. Per l'historya ordeifer la val Tujetsch ei remarcabla 'Il Cumin fatgs dils students della claustra de Mustér vi las Bovas 1856'.

Scolast Steiner ei in um de profunda pietad: En tutt'aura mava el minga tiarza dumengia a Sumvitg per prender part alla devoziun dil s. Sacrament sco commember della confraternita dil s. Sacrament. – In um che ha enrihiu Tujetsch cun sia scola, sia ovra de historia locala e siu expempe cristian.

Fontaunas

Berther P. Baseli. Selva avon 100 onns. Notizias cultur-historicas ord la vall Tujetsch. Mustér 1909

Cudisch parochial de Sumvitg

Manuscret 186 ella Biblioteca Romontscha della Claustra de Mustér

Necrolog: Gasetta Romontscha dils 6 d'october 1904

Monsignur Gion Benedetg Venzin (1892–1955)

Naschiu a Selva ella fracziun Sutcrestas ils 13 de schaner 1892 fa quei vischin il gimnasi a Sarnen, entra el seminari de s. Leci a Cuera e vegn ordinaus spiritual ils 22 de fenadur 1917. El daventa plevon a Breil, nua ch'el renovescha il chor ed ils altars della baselgia parochiala. Ils 20 d'october 1932 vegn el elegius canoni e custos della catedrala a Cuera e lu plevon della catedrala igl emprem de schaner 1933. Anno 1935 baghegia el la baselgia dil Salvader a Cuera e surpren leu la pleiv 1938. Igl onn 1941 daventa sur Venzin decan dil capetel catedral ed ils 31 de december dil medem onn vegn el nominaus vicari general. Il tetel de protonotari apostolic 1946 ei la renconuschientscha ecclesiastica de sia activitad sacerdotala e diocesana. Dapi 1950 entscheiva ina malsogna maligna a sgurdinar la constituziun muntagnarda dil prelat ed ils 15 d'uost 1955 liberescha la mort quei um meritau d'ina liunga suffrientscha.

Sur G.B. Venzin fuva igl um della lavur ed iniziativa. El ha buca mo renovau e baghiau baselgias, mobein era mussau in maun pratic ed efficient ell'administraziun dils beins dil capetel catedral de Cuera e prestau ina immensa lavur sco vicari general della vasta diocesa. – Suenter il barschament de Selva 1949 ha el rimnau 33 000 francs per gidar siu vitgativ. Dasperas ha el anflau peda per publicar contribuziuns romontschas el 'Calender Romontsch' ed ella 'Vusch dils Mats'. El ha transla-

tau per 'Nies Tschespet' duas ovras de Cristoffel Schmid ('Ils ovs de Pas-tgas' 1925, 'Igl utschi canari' 1933). El ha procurau l'ediziun dil cudisch «1500 Jahre Bistum Chur» (Ediziun NZN 1950). Sco premurau Romontsch ha el representau la Romania ella suprastanza della Ligia Romontscha duront 11 onns.

Fontaunas

Berther Tumaisch. Spirituals, fraters laics e muniessas della vischnaunca de Tujetsch. Separat dil 'Pelegrin' 1959/60

Folia officiosa 1952, nr. 6. — 1955, nr. 10

Gasetta Romontscha nr. 66, 19 d'uost 1955

Gasetta Romontscha nr. 67, 23 d'uost 1955

Calender Romontsch 1956

Cau-inschignier Erminio Bernasconi (1876–1964)

Entraus igl onn 1899 el survetsch della Viafier retica daventa quei Tessines, burgheis da Torricella, 1920 capo-inschignier della RhB a Cuera. El exequescha las lingias de viafier Rehanau-Mustér, Tavau-Filisur, Bever-Scuol e Samedan-Pontresina. Bernasconi muossa in grond talent per construcziun ed organisaziun e capescha de dar curascha ed anim a ses collaboraturs.

Il contact cun nies territori, surtut cun Tschamut nescha, cura che Bernasconi s'engascha per la reconstrucziun della Viafier Furca-Alpsu. Sia finamira ei de segirar la lingia Mustér-Ursera era duront igl unviern. Ord quei motiv pren el dimora a Tschamut, fagend ina casa ord la cantina dils luvriers della lingia. Da Tschamut ano observa el il cuors dellas lavinas che smanatschan il tren e baghegia ord quellas experientschas las dustonzas e gallarias necessarias encunter la neiv. Igl unviern 1951 destruescha la lavina sia casa a Tschamut, ferton ch'el sez, sin viadi tras il Gottard, vegn serraus en cul tren tras las lavinas al nord ed al sid dil tunnel. Suentar baghegia Bernasconi ina casa a Sedrun, a Niriël, e passenta la sera de sia veta en Tujetsch. La vischnaunca de Tujetsch dat ad el per siu engaschi il dretg de burgheis d'honor.

Il ligiom cun Tschamut vegn rinforzaus cun in schabetg ell'atgna famiglia: Ils 11 d'uost 1932 serenda il feagl digl inschignier E. Bernasconi, Giacomo Bernasconi, cun quater auters turists da Tschamut ano sil Péz alv davos ella Val Maighels. Returnond crodan Giacomo e siu amtig Arturo Lafranchi sil Glatscher de Maighels en ina sfendaglia. Lur situaziun ella profunditad de 20 meters ei ualti desperada. Mo ei reussescha tras

in bien gartetg de trer ora omisdus giuven. Per engraziament alla providentscha divina edeschan ils spindrai ina broschura culla descripziun digl accident ed il recav della vendita vegn daus per la restauraziun della caplutta s. Clau e s. Bistgaun a Tschamut. La broschura secloma: «Las sfendaglias dil glatscher el survetsch dil Segner».

Fontaunas

Erminio Bernasconi, Dipl. Ing. ETH. Alt Oberingenieur der Rhätischen Bahn 1876–1964. Bürger von Torricella TI und Tavetsch GR, en: Biographisches Lexikon verstorbener Schweizer, tom 6 (1969), p. 188

Bernasconi Giacomo/Lafranchi Arturo. Las sfendaglias dil glatscher el survetsch dil Segner. Mustér 1933

Impressari Gaudenz Loretz (1921–1972)

Naschius a Selva ils 24 de schaner 1921 sco siatavel fegl de 13 affons dals geniturs Michel e Maria Loretz (nata Deflorin) frequenta Gaudenz la scola primara a Selva e la scola secundara a Camischolas. Siu temperament impulsiv semuossa bein en enqual stucca de scholars. Suententer la scola gida el il bab el menaschi puril e lavura tscheu e leu sco luvrer d'uaul, manual e miradur. El posseda il senn practic e cun gronda energia e luvrusadad seprepara el 'dalla pala ensi' per siu mistregn futur. Il barschament de Selva 1949 munta pil giuven Gaudenz la viulta decisiva. El banduna il vitg natal e baghegia a Sedrun el quartier 'Selva nova' ina casa. Egl onn 1950 entscheiva el a baghiar si in'atgna interpresa de construcziun. 'El o entschiet cun nuet', confirmescha aunc oz siu dunna. Encunter difficultads de tutta sort reussescha el, grazia a siu dun d'organiziun e calculaziun. El gida a reconstruir il vitg de Selva e survegn lu dallas Ovras electricas Rein anteriur ina gronda lavur en Val Curnera. Duront quater onns meina el atras la megliuraziun funsila a Sursaisa ed el fa era la nova punt el vitg de Sedrun. Anno 1964 baghegia el il hotel 'Alpina' che resta tochen oz en possess della firma. Cun quei svilup legreivel sa Gaudenz metter ina basa economica pli largia: 1960 daventa sia interpresa privata ina Societad acziunara: Loretz SA.

Anno 1952 marida igl impressari la giuvna Ludivina Schmid da Cavorgia, la quala regala ad el in buob e treis mattatschas. Quei ei siu grond plascher e malgrad siu grond engaschi pren il bab peda per sia famiglia. Externamein plitost d'in character de forza ha nies um de Selva in bien cor. Ses luvrers – dus Talians lavuran aunc oz tier la firma dall'entschatta enneu – apprezzieschan lur chef. El ei in grond veneratur de Nosadunna, recitescha il rusari e pelegrinescha pliras gadas a Lourdes.

Enamiez la lavur e la fuola – el luvrava vid treis vias: Segnas, Trun-Schlans e Trin – vegn Gaudenz Loretz tuccaus d'ina attacca dil cor en siu auto el caraun a Cuoz sur Mustér ils 6 de settember 1972. In grond pievel accumpogna igl impressari sil santeri de Sedrun ils 9 de settember 1972. Duront il survetsch divin fan ses luvrers guardia entuorn la bara. – L'interpresa Loretz vegn menada vinavon dalla famiglia Loretz e fa part dalle firmas indigenas che han contribuì al svilup economic della Sur-selva. Il fundament ei vegnius mess dal vischin iniziativ de Selva, Gaudenz Loretz.

Fontauna

Necrolog ella Gasetta Romontscha dils 3 d'october 1972 d'in convischin (Leci Jacomet)

Postscriptum

En in senn pli vast savein nus era prender ella gliesta dils umens prominents de nies territori ils hosps de vacanzas che han priu dimora egl enconuscent hotel 'Rheinquelle' a Tschamut. El cudisch dils hosps anflein nus beinenqual um de 'prominenza'. Ils 18–26 de settember 1872 ha fatg vacanzas leu igl autur Conrad Ferdinand Meyer. Dus onns pli tard eis el returnaus en quei hotel per scriver duront sis jamnas il roman 'Jürg Jenatsch'. Vinavon anflein nus leu sco hosps il redactur e poet Samuel Plattner (1838–1908) e siu frar, il historicher e politicher Placidus Plattner (1834–1924). In auter hosp interessant de Tschamut ei staus il liricher e dramatischer Hanns von Gumpenberg (1866–1926)